

UTL AT DOWNSVIEW



D RANGE BAY SHLF POS ITEM C
39 10 11 03 15 012 5

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

DR
568
.8
Z5S2

Zihni Paşa, Mustafa
Beyan-i hakikat

بیان حقیقت

مجلس اعیان رئیس سعید پاشا حضرتلرینک خاطر اتنده مندرج
بعض مواد اعیان دن ذهنی پاشانک جوابی .




مکتبہ المصنفین و المصنفات

طبع و نشر منشی

۱۳۲۷

مکتبہ المصنفین و المصنفات
طبع و نشر منشی
۱۳۲۷




Zihni Paşa, Mustafá

بیان حقیقت

مجلس اعیان رئیس سعید پاشا حضرتلرینک خاطر اتنده مندرج
بعض مواده اعیاندن ذهنی پاشانک جوابی .

Beyān-ı hakikat




تذکره حیات و شجره کائنات

طبعه مطبعه عثمانیه

۱۳۲۷

DR
568
.8
Z5S2



بیان حقیقت

مجلس اعیان رئیس سعیدپاشا حضرتلری ۲۱ و ۲۲ کانون
ثانی سنه ۳۲۵ تاریخلی « طنین » غزته سیله نشر ایتدکلی ایکی
مقاله ده بغداد خطندن بحث ایدرک مقاله نامه یه اساس اولان
مذاکرات حقنمه بر طاقم بیانانده بولندیلرکه خلاصه مفادی
قومپانییه لهمزده اوله رق قبول ایتدیریلن موادک صرف اثرسی
مخصوصلری اولدینی سویلکدن عبارتدر . بونلرک مشارالیهجه
خدمت ذاتیه کی کوسترلمسی نافعہ نظارتک وظیفه سنی ایفا ایتماش
اولدینی وصدارتک مداخله سی اولمسه منفعت دولتک نظارتجه قصداً
ویامن غیر قصد امانه ایدیله جکی معناسنی اشراب ایده یور؛ اوزمان
نافعه نظارتی عهده مه مودوع ایدی . سعیدپاشا حضرتلرینک تصویب
بیوردقلری وجهله حرکت ایتملری اجتهاد ذاتیلرینه عائد بر مسئله در؛
فقط ایستدکلی نقطه یه ارتقا ایچون شخص عاجزانمه تعرض
ایتملرینی بالطبع تجویز ایده مم . بونی کندیلری ده تجویز بیورمز لر
امیدیه « طنین » غزته سنده کی نشریاتنی متعاقب ، مجلس عمومی
شمدیکی عدلیه نظارتی دائره سنده ایکن ، شفاهاً بیان حقیقت و ابراز
وثائق ایتماش ایدم ، سوزمی استماع ایله اعتذار بیورمشاردی . لیکن بوندن
صوکره مشارالیه طرفندن مجموعه خاطر اتک برنجی جلدینه حقمده
بعض اسناداتی حاوی دیگر مباحث درج ایدلیکنی کوردم . ارتق

بونلر ایچونده کندیلرینی تصدیع بیهوده و صورت علییهده رد اسناد مقتضی ایدی. فقط لازم اولان اوراق و وثائق تماماً نزد مده موجود دکل ایدی. اکمال و ثائق بر خیلی سعی وزمانه محتاج، عوارض وجودیهه ایهه بویله مساعی منضمه تحملنه نامساعد ایدی. نه چاره که خاطر اتک بعده انتشار ایدن جلد ثانیهی اولجه نشر اولنان بغداد خطی مباحثی شامل و بوندن بشقه دیگر بر طاقم ایهامات و اسناداتی ده محتوی اوله رق ظهور ایتدی. الی سنده نبرو ایفا ایتدیکم خدمت دولتمده کی مسلک و حرکت حقیقت بین اولنلرجه معلوم اولدیغی دوشونمکله برابر نام و ناموسمک اواخر حیاطمده — نه مقصدله اولورسه اولسون — لکه دارایدلک ایستلمسنه قارشو سکوت ایده مدم. تاریخده بریر اشغال ایتک ادعا و لیاقتندن برییم؛ بونی بیلیرم. آره دیغ شی صرف شخصمه تعلق ایدن خصوصیلرده حقیقتی ارائه و وثائق رسمیه سنی ابراز ایله تزکیه نفسدر. اجراءات مدیده سیله بر شخص تاریخی اولان سعید پاشا حضر تلرینک خاطر اتندن بکا تعلق ایتیان اقسامی حقنده حرف واحد سوویله جک دکل؛ بو وظیفه عصر حاضر تاریخی یازه جق اولان مدققین اخلافه مودوعدر.

مشارايه سعيد پاشا حضرتلری ۳۱۷ سنه سنده التيجی دفعه اولق اوزره مقام صدارته وقوع مأموریتلرندن مقدم بوخط حقنده جریان ایدن مذا کرا تده حقوق دولتک ضیاعنی موجب شرائط موجود ایکن صدارته مأموریتلری اوزرینه واقع اولان سعلریله رفع ایدلیکنی بالیان « موسیو زاندر و موسیو هوکنی تردیمه جانب ایله ذهنی پاشا حاضر اولدینی حالد ایشک کرک جهت مالیه سنجه کرک جهات سائر سنجه دهها زیاده استحصا ل تعدیلاته صرف مساعی ایلدم. شو تشبث نتیجه سنده تحصیل اولنان تعدیلات شونلردر: اولاً تأمینات اچقه سی وایشلتمه مصرفی دولتک شم دیکی بودجه سنه تحمیل اولنمیوب دیون عمومیه نک توحیدی اوزرینه تقرر ایده جک واردات جدیده دن ایفا اولنه جقدر. ثانیاً : خط جوارنده مهاجرین اجنبیه اسکان اولنیه جقدر. ثالثاً : حکومتک هر نه زمان ایستر ایسه خطی مبايعه یه صلاحیتی اوله جقدر. رابعاً : خطک بعض اقسامی وقت معینده انشا اولنه مزایسه ترتب ایده جک جزا بحثی - که نظارتله شرکت بیننده مختلف فیه قالمشدی - بو اختلاف کلیاً ابطال اولمغله شرکت عموم خطک اوقات معینه سنده انشاسیچون تکلیف ایتدیکمز شرائطه تابع اوله جقدر. خامساً خط آخر شرکته دور وفراغ اولنه میه جقدر. سادساً : دیار بکرله خرپوته برر شعبه انشا اولنه جقدر. سابعاً : عسکری موقوفلر تأسیساتنه آیروجه درت ملیون فرانق صرف ایدیه جکدر. ثانیاً : نقلیات عسکریه وسائر مه دائر تکلیف ایتدیکمز مواد ایفا و برده شرکت طرفندن هر سنه

دارالعجزه به بشیوزلیرا اعطا قلنه جقدر. تاسعا : بغداددن بصره به
متشعب اوله جق خطك نقطه انتهایه سی [کویت] اوله جفی موجود
لایحه لرده کوسترلمش ایسه ده تخصیص موقع اولنیه رق انتهای نقطه
ایلروده حکومته شرکت بیننده بالما کره تعیین ایدیه جکدر. ایشته
بوماده لر شرکته قبول ایتدیرلدی ومقاوله به ادخال اولندی ایسه ده
موسیو زاندر وموسیو هوکنن تأمینات اچقه سندن انجق بر بشیوز
فرانق ده تزیلنه یعنی مأموریتیم عقبنده کیلو متروباشنه قرارلشمش
اولان (۱۳۵۰۰ فرانق) تأمینات اچقه سندن تسکلیفم اوزرینه
موافقت ایتدکلی (۱۰۰۰ فرانقه) بش یوز فرانق ده علاوه
سیله بونی (۱۱۵۰۰ فرانقه) ایندیرمکه موافقت ایده بیلدیلر .
[۱۳۵۰۰ — ۱۵۰۰ = ۱۲۰۰۰ اولمق لازم کلدیکی حالده
طنین غزته سنده اولدینی کبی خاطراتده دخی هر نصاسه یا کلش
یازلشدر] شوقدر که اشبو بش یوز فرانق تزیلنه موافقت
رسمیه لرینی طرف شاهانه دن اراده بیوریلور ایسه عرض
ایلیه جکلرینی یعنی نزد مده کی افاده لرندن طولای بر تعهد رسمی تحت
کیرمدکلرینی ذهنی پاشا حاضر ایکن علاوه و ایراد ایلدیلر . نهایت
مسئله بی مجلسه قویدم حضاردن بعضیلری بز تأمینات اچقه سنی
(۱۲,۰۰۰ فرانق) اوله رق عرض ایدم طرف شاهانه دن بش
یوز فرانق ده تزیلی اراده بیورلسون بوصورتله تأمین تمتع اچقه سی
(۱۱,۵۰۰ فرانقه) تنزل ایتسون ایشده بیتسون دیدیلر بن شو
اخطار اخیره اعتراض ایله هیئت وکلا مصالح دولتی کندی مسؤانی
تحتنده رؤیت وعرضه مجبور اولدیغندن او یله یوللره کیتمه و بلا

مجبوریة درجه درجه قرار اتخاذ ایتکه محل یوقدر دیدم . بناءً
 علیه قلمه النان مضبطه به تأمینات اچہ سندن دہا بش یوز فرانق
 تنزیلہ شرکتک موافقت ایدہ جکی قرائت احوالہن محسوسدر دیو
 برفقرہ علاوہ ایتدیردم . بونک اوزرینہ صدور ایدن ارادہ رسمیدہ
 « دہا زیادہ تنزیلات اجراسی ارادہ بیوریلہ جغندن اول امردہ
 نافعہ نظارتندن ذکر اولنان بش یوز فرانقک تنزیل ایتدیرلمسی
 ومواد سائرہنک بروجہ استیدان اجراسی » عبارہ لری مسطور
 ایدی . فقط دہا زیادہ تنزیلات اجراسی ایچون سفیرہ وقوع
 بولہ جغنی بیان بیوریلان ارادہ نہ نتیجہ حاصل ایتدیکی معلوم
 اولہمدی . »

اولاً تأمینات اچہ سی مسئلہ سنی تدقیق ایتک ایجاب ایدیور .
 سعید پاشا حضرتلری بحث بیوردقلری آلتنجی دفعہ کی خدمت
 صدارتی ۵ تشرین ثانی سنہ ۱۳۱۷ تاریخندہ قبول ایتدکلیخی
 خاطراندہ بیان بیوریورلر [صحیفہ ۱۰۰] . ایشته صدارتہ هنوز
 تعیین بیوردقلری کونہ مصادف اولان ۵ تشرین ثانی سنہ ۳۱۷
 تاریخندہ مابین باش کتابتندن النان تذکرہدہ « حیدر پاشا شمندوفری
 دیرکتوری موسیو زاندرك اخیراً برلیندن عودت ایتمش اولمسنہ
 نظراً بغداد تیمور یولی حقندہ مومی الیہ ایلہ اجراسنہ اولجہ ابتدار
 اولنان مذاکراتک الکالی ضمنندہ کندوسیئلہ ملاقات ایدلمش اولق
 لازم کلہ جکندن مذاکرات واقعہنک نہ شکل ودرجہ بہ واصل
 اولدیغنک عرض واشعارى مقتضای ارادہ سنیدہن ایدوکی « تبلیغ
 قلمسی اوزرینہ جواباً مابین باش کتابتہ تقدیم اولنان تذکرہ

نظارتده - که اشبو تذکره نك مسوده سی نظارت اورا قنده محفوظدر - مقاوله و شرطنامه لایحه رینك اکثر موادی موسیو زاندر و موسیو هوکنن ایله جریان ایتش اولان مذاکرات اوزرینه تعدیلاً و تصویب عالییه معلقاً قرارلشدیرلدیغی محرر و تأمینات اچقه سی بختده ده آتیده کی فقره مندرجدر .

« بادی امرده تأسیسات ابتدائیہ سرمایہ سی فائض ورأس المال اچقه سنك تأمین ایچون کیلومترو باشنه (۱۳,۵۰۰ فرانق) تخصیصی و بوندن بشقه ایشلتمه مصارفی ایچون دخی حاصلات غیر صافیہ نك یوزده الیسی بهر کیلومترو باشنه سنوی درت بیک بش یوز فرانقندن دون اولور ایسه او مقداره ابلاغی طلب و تکلیف ایتمکده اولدقلری حالده مباحثات واقعه اوزرینه برلینله بالمخبره (۱۳,۵۰۰ فرانق) (۱۲,۵۰۰ فرانقه) تنزیل و ایشلتمه مصرفی دخی حاصلات غیر صافیہ اون بیک فرانقه وارنجیه قدر کیلومترو باشنه سنوی درت بیک بش یوز فرانق تعیین ایله حاصلات غیر صافیہ اون بیک فرانقی تجاوز ایدرسه اون بیک فرانك اوست طرفنك یوزده یکرمی بشنك دخی شرکته اعطاسی صورتیله تعدیل ایده بیله جکلرینی بیان ایلشلر ایسه ده بو حسابجه ایشلتمه مصرفیله برابر تأمینات اچقه سی اون یدی بیک فرانقی تجاوز ایدرك انقره خطنك ایشلتمه مصرفیله برابر تأمیناتی اون بش بیک فرانقندن عبارت اولوب بغداد خطنك اکثر جهاتی اراضی بسیطه دن اولمسیله بو کذر کاھک اختیاری دخی تأمینات اچقه سنك اھون اولمسی مقصدینه مبتنی ایدو کندن بالاطراف تبلیغ و تفھیم اړاندینی حالده نظارته

قارشی بوندن زیاده تنزیلات اجرا ایدیلهمیه جکی احساس ایدلمش اولمغله مذاکراتک حاصل ایده جکی نتیجه اوزرینه مذکور لایحه لریک بالاکمال تقدیم قلنه جنی عرض اولنور .

شو ایضا حاکدن مستبان اوله جنی اوزره تأمینات اچمه سنک مقداری نظارتجه جریان ایدن مذاکرات اثناسنده (۱۲,۵۰۰ فرانغه) تنزیل ایدلمشدر. بوصولت نظارتک مأمورین سابقه وحاضره سندن بعض دواتک ومومی الیهم موسیو زاندر وموسیو هوکسنگ دخی معلوملریدر . آتیا درج اولنه جق وناقندن آکلاشیله جنی کبی تأمینات اچمه سی مجلس وکلاجه (۱۲۵۰۰) فرائق اولمق اوزره عرض ایدلمش و اخیراً (۵۰۰) فرائق اراده سنیه موجبنه تنزیل اولمشدر . بوتنزیک موسیو زاندر طرفندن اراده سنیه تعلیق ایدلمی شرکتک اساساً راضی اوله جنی برتکلیفی باراده قبول ایله ذات شاهانه یه عرض جمیله مقصدینه مستند اولمق لازم کله جکی درکار وبالاده کی فقره نک نهایتلرنده نظارته قارشو بوندن زیاده تنزیلات اجرا ایدیلهمیه جکسنگ احساس اولندیغنی مین اولان عباره دخی بونی مؤیددر .

تأمینات اچمه سنک تعیین وتحدیدی بحثده کی یا کلسلق شوصورقله تعین ایتدکن صکره مشارالیهک اثر دقت وغیرتی اوله رق تعدیل واستحصال اولندیغنی بیان ایلدیکی مواد تسعه یه کنبه : ۶ مایس سنه ۳۲۶ تاریخنده یعنی سعیدپاشانک صدارتندن بریحق سنه مقدم « بغداده قدر تمیدی مقرر بولنان شمندوفر خطی ایچون اجرای مذاکرات ایلک اوزره در سعادته کلن هیئتله

اجرا اولنه جق مذاکراته اساس اتخاذا ایدیله جک مواد صورتنک عرضی « حقنده مابین باش کتابتدن نافعہ نظارتنه کلان تذکرہ یہ جواباً یازیلان ۸ مایس سنہ ۳۱۶ تاریخی تذکرہ نظارتک ملفوفی اولان ورقہ ده : » خطک کذرکاه وجوارینه مهاجرین اجنیہ جلب واسکان اولنامسی - مدت انشائیہ نک سکزسنہ اوله رق تحدیدی - بو خطری شرکتک هیچ بروقت اخر شرکته دور و احاله ایدہ مامسی - حکومت سنیہ نک بونلری هر آن مبیاعه ایتک حق و صلاحیتک محفوظ اولسی - خط اصلی دیار بکر و موصل شهر لرندن و یا خود بونلره آزر مسافه دن مرور ایتیه جک اولور ایسه مذکور شهر لری لزومی تقدیرنده خط اصلی یہ شعبه لرله ربط ایدلسی « فقره لری مندر جدر . بو حالده مواد تسعة مذکورده دن خط جوارنده مهاجرین اجنیہ اسکان اولنامسنه دائر ایکنجی ، خطک ایستلدیکی زمان حکومتجه مبیاعه صلاحیتی حاوی اوچنجی ، خطک اخر شرکته دور و فراغ اولنه مامسنه دائر بشنجی ، دیار بکرله خرپوته شعبه لر انشاسی حقنده کی التنجی ماده لر دولتجه اسکیدن بری مقرر اولدینی اکلالمقدمه و بناء علیه مواد مذکورده نک سعید پاشا حضر تلرینک اثره متلری اوله رق تلقیسنه امکان قالماقده در . مدت انشاآتک سکزسنه اولسی دخی نظارتجه تنظیم ایدیلان سالف الذکر پروغرام جمله مندرجاتنددر .

ینه بو خصوص حقنده ۱۶ کانون اول سنه ۳۲۷ تاریخیله نافعہ نظارتندن ، یازیلان و مسوده سی کذلک نظارت اورا قنده محفوظ بولان تذکرہ مفصلده ده : « قونیہ دن بغداد و بصره یہ قدر انشا

اوانه حق شنندوفر حقنده کی لایحه لر حقوق امتیازیه جه صلاحیات
واسعه بی شامل اولدیفندن حقوق حاکمیت سنیه نك محفوظیتیه برابر
ایشك اهمیتی نسبتنده تسهیلات ممکنه ارائه سی صورتلری نظر
ملاحظه اله نهرق مجلس اداره رئیس اولی موسیو زاندر ورئیس
نائینی موسیو هوکنن ایله جریان ایدن مذاکرات اوزرینه کړك
تصویب عالییه معلقاً قرارشدریلان وکړك نظارتجه موسیو الیها ایله
اتلاف حاصل ایدیه میان مواد قونیه تیمور یولی مقاله نامه سی
نسخه مطبوعه سی اوزرینه علاوه اولنه رقی لفاً و سالف الذکر مقاله
ابتدائی صورتیه خط مذکور کدرکاه و شعباتی مبین خریطه دخی
معاً تقدیم قلنمش و مذکور لایحه لرك مواد مندرجه سنك برطاقی
قونیه و انقره مقاله و شرطنامه لرینه موافق اولدینی جهتله انلردن
بجته حاجت کوریه میوب تعدیل و تصحیح اولنان مواد حقنده کی
مطالعات بوجه زیر عرض و تزییر اولمشدر « مقدمه سیله سوزه
باشلانمش اولسنه کوره ایشك بوتذکرده ایضاح اولنان درجه سی
سعید پاشا حضرتلرینك محصول مساعیسی اوله میه جنی درکاردر
ذکر اولنان تذکره مفصلده ایسه :

« اشبو تیموریولك جوارینه مهاجرین اجنیه جلب واسکان
اولنیه جغتك مقاله نامه نك جزؤ متممی اولمق اوزره شرکت طرفندن
حکومت سنییه بر مکتوب تحریریه تأمین ایدلمسی دخی جمله
مذاکراتدن اوله رقی اشبو مکتوبك صورتی علاوه ملفوفات
اولمشدر . »

« حکومت سنییه هر نه زمان ایسته نیلیر ایسه خطك مباحه سنه

صلاحیتی حاوی اون طقوزنجی ماده‌یه علاوه اولنان فقره مقدمه
تعاطی قلنان مقاولهٔ ابتدائیه حکمی ایجابندن اوله‌رق الخ
« دیاربکرله خریوته حکومت سنیه‌جه اختیاری و شرکته
مجبوری اولمق اوزره شعبه انشاسنه دائر اوتوز سکزنجی و خط
اصلینک لدی الحاجه شام - حما و تمیدی خطی ایله التصاقه متدائر
اوتوز طقوزنجی ماده‌لر حکومت سنینک منافعه‌عائد اولوب مجدداً
علاوه ایدلمش اولدینی کبی »

« قرق‌بشنجی ماده موقفلری ایله متفرعاتنک تأسیساتی ایچون
دائرةٔ جلیلهٔ عسکریه ایله بالماذا کره درت‌ملیون فرانقه‌قدر شرکته
اختیار مصارف ایدلمک مجبوریتنی محتوی اولوب (نظارتجه تنظیم
قلنان لایحه‌یه) کذلک مجدداً علاوه قلمش »

« شرطنامه‌نک یکرمی‌التنجی ماده‌سنده عساکر شاهانه و ژاندارمه
و پولیس ضابطان و افرادی ایچون معین اولان ثلث اجرت ربعه
تنزیل و اجرتدن معاف طوتیله‌جق اوتوز کیلو غرام اشیای ذاتیهٔ
عسکریه شمدی‌یه دکن مختلف فیها اولدینی حالده او اختلاف دخی
ازاله ایله اشیای مذکوره‌نک انواعی تعداد و تصریح ایدلمش »

فقره‌لری عیناً مندرجدر. بناءً علیه سعید پاشانک سعی ذاتیسنه
اضافلهٔ تعداد ایتدیکی طقوز ماده‌دن ایکنجی ، اوچنجی ، بشنجی ،
التنجی ، یدنجی ، سکزنجی ماده‌لرینک یعنی التی دانه‌سمنک هنوز
سعی دکل علمی بیله لاحق اولمهدن نظارتجه قرارلشدیرلمش واشبو
مقرراتنک جمله‌سمنک نظارتجه تنظیم و باب عالی‌یه تقدیم قلنان مقاوله‌نامه
لایحه‌سنه درج ایدلمش اولدینی بداهةً اکلاشلماقدهدر

ذکر اولنان تذکره مفصله نك صوك بندي جريان کيفيتي پک

بارز بر صورتده ارائه واثبات ايديور :

« تفصيلات معروضه دن مستبان اوله جني اوزره مصلحتك اهميت وجسامتي جهتيله اساساً وفرعاً شايان تدقيق اولديغندن نظارتله شرکت بيننده قرارلشديري لان مواد قرار وتصويب عاليه معلق اولديني کي نظارتجه بادي تردد اولان موادك برنجيسي زيبردن قديميه برشعبه وقديمه ده برليمان انشاسي ايکنجيسي انقره وقونيه خطلري مدت امتيازیه سنك دخي بوتاريخدن اعتباراً طقسان طقوز سنه يه ابلاغی اوچنجيسي ايفای تعهد اولمديني حالدله ترتب ايدم جک جزانك تعيني دردنجيسي نظارتجه جريان ايدن مذاکره ده اون ايکي بيک بشيموز فرانغه تنزيل ايديلان ونظارتجه ينه شايان استکشار کورينان تأمينات اچمه سنك تعين مقداری بشنجيسي انقره وقونيه خطلرينك تقويه وتنظيم اداره لری ايچون تخصیصات مخصوصه اعطاسي خصوصلريدنر. بو خصوصلر حقنده مومي اليهما دخي حاضر اولديني حالدله حضور سامی صدرتپناهيلرنده جريان ايدن مذاکره ده ايفای تعهد اولمديني حالدله ترتب ايدم جک جزايه دائر اولان اختلاف برمنوال معروض بر صورت استلافیه اقراران ايلمش ايسه ده ديکرلری حقلرنده افادات واقعه لرینی تکرار ايلدکلرندن هر برلری حقنده نظارتجه وشرکتجه درميان اولنان ملاحظاته نظراً اجرای ايجاباتی بالوجوه منوط رأى عالی صدرتپناهيلری بولمغله اولبايده.»

اولاً شو بنك فقره اولاسنده [نظارتله شرکت بيننده قرارلشديري لان مواد قرار وتصويب عاليه معلق] دينيله رك مقررات

واقعہ نك باب عالينك تقدیرينہ براغلمسی بومقرر اٹك صرف نظارتجہ
 - قید استیدان ایلہ - اتخاذايدلمش اولديغنی صراحة کوسترمکده در .
 ثانیاً بوفقرہ مؤداسندن واضحاً اکلاشیلور کہ نظارتجہ شرکتلہ
 بالمداکرہ تذکرہ مفصلہ دہ تعداد اولئان نتائج استحصال ایدلدکن
 صکرہ رسماً صدارتہ یازلمہ دن اول سعید پاشا حضرتلرینہ بیان
 حال ایدلمش واونك اوزرینہ مشارالیهك خاطر ائندہ بیان
 ایتدیکی ملاقات واقع اولوب فقط دیدیکی مادہ لر دکل ، بند مذکور دہ
 نظارتجہ معرض تردد دہ کوستریلن دیگر بش مادہ اوزرینہ مداولہ
 افکار ایدیلہ رک انحق بونلردن یالکز جزا بجئی بر صورت ائتلافیہ
 ربط ایدیلہ بیلمشدر کہ تذکرہ مفصلہ مذکور دہ بومادہ نك اثر
 صدارتپناهی اولدینی وماہیت وحقیقتی نہ دن عبارت بولندینی
 تماماً مصر حدر .

ایستہ بوکا دائر اولان فقرہ دہ عیناً شودر : « ایفای تعہد
 اولندینی حالہ ترتب ایدہ جك جزای متضمن اولان یکرمی
 طقوزنجی مادہ یہ کلنجہ بوبادہ کرک قونیہ مقاولہ نامہ سندہ وکرک
 سائر مقاولات دہ معین اولان جزا امتیازك کلیاً سقوطنی حاوی اولدینی
 حالہ مومی الیہما ایکی بیک بش یوز کیلو مترو مسافہ یی حاوی
 اولان برخطہ شاید بر قسمنك مدت معینہ ظرفندہ انشاسی تأخر
 ایتدیکی حالہ امتیازك کلیاً سقوطی موافق حق وانصاف اولہ مامقلہ
 برابر بویلہ بر جزانك مقاولہ یہ درجی سرمایہ دارانی اخافہ ایدرک
 حصول مقصدہ مانع اولہ جغنی در میان ایلہ خطك بہر قسمی ایکیشر
 یوز کیلو مترو اعتبار ایلہ ہرہانکی قسمدہ ایفای تعہد اولتمازایسہ

اوقسم اوزرنده کی حق امتیازك سقوطی صورتی تکلیف ایدرک شو بحث نظارتله مومی الیها اره سنده دوچار اختلاف اولدینی حالده حضور سامی صدرتپناهیلرنده مومی الیها دخی حاضر اولدقلری حالده جریان ایدن مذاکره اوزرینه شرکته هانکی قسمده ایفای تعهد اولنماز ایسه اوقسمده کی حق امتیازك سقوطیله برابر قونیهدن بغدادده قدر خط اصلی کاملاً انشا اولمדיنی حالده بغداددن بصریه قدر اولان قسمك شرکته ایشلدیله مامسی ایچون بر فقره مخصوصه درجی تنسیب قلمش ... »

مداخله صدرتک بومادهده صراحة ذکر ایدلمش اولسی دیگرلرینک بوندن آزاده بولندیغه برهان واضح اولدقن بشقه بوماده اوزرنده ذات سامی صدرتپناهیجه تحصیل اولنان ائتلاف شرکتک نقطه نظرینی همان تمامیه قبولدن عبارت بولنسنه کوره بونتیجهنک « بواختلاف کلیاً ابطال اولنمغه شرکت عموم خطک اوقات معینه سنده انشاسی ایچون تکلیف ایتدیکمز شرائطه تابع اوله جقدر » عباره سیله کوسترملک ایستلدیکی درجهده بر اثر موفقیت اولوب اولمדיنی ده شایان تأملدر. خصوصیه نظارتدن جواباً مابین باش کتابتنه یازیلوب بر فقره سی بالایه درج اولونان ۶ تشرین ثانی سنه ۳۱۷ تاریخلی تذکره نک دیگر بر فقره سنده :

« مباحوث عنه اولان اوچ نقطه نک برنجیسی بالعموم مقاوله نامه لرده اسباب مجبره دن منبعث اولمقسزین خطک بر قسمی انشا اولنماز ایسه امتیازك کلیاً سقوطی مندرج اولدینی حالده مومی الیها قونیهدن و بغداددن انشاته ایتدار ایله اورتهده هر قنغی محللر انشا

اولئماز ایسه او محملرك امتیازینك سقوطنی مقاوله یه درج ایتدیرمك ایسته یوب بوا یسه بکندکری محملرده تیمور یولی یا بمق یکنم دکلری محملرده یا بمق دیمك اوله رق انلرك بکنم دکلری محملرده امتیازلری ساقط اولسه بیله اورالره دیگر طالب ظهور ایتیه جکی جهته بغداده قدر تیمور یولی یا پلسی مقصدی حاصل اوله میه جغندن بوبابده جریان ایدن مباحثاتك نتیجه سنده نظارتك تکلیفك حق و مصلحته موافقتی مومی الیهما طرفندن دخی اعتراف ایله برلیندن تکرار تعلیمات ایسته جکی افاده قلمشدر. «دینلمش، یعنی بوصولت ائتلافیه نظارتجه اساساً تصویب اولنماش ایدی .

ایشته مشارالیهك کوستردیکی طقوز ماده دن دردنچیسنك حکمی ده بودر .

نافعه نظارتك بیان اولنان تذکره سی اوزرینه مجلس وکلاجه بالندا کره تنظیم ایدیلوب اراده سنیه یه اقتران ایدن مضبطه نك نظارته تبلیغنی متضمن اوله رق مشارالیه سعید پاشانك امضاسیله و ۳ کانون ثانی سنه ۳۱۷ تاریخیه نظارته کلن تذکره صدارت معلومات متممه یی حاوی وتأمینات اچمه سنك تنزیلی خصوصنده ده حقیقت حالی مین اولدینی جهته آتی یه عیناً درج ایدلای :

تذکره صدارت صورتیدر

قونیه دن بغداد وبصریه قدر تعیین اولنه جق کذرکاه و شرائط وتأمیناته معلقاً بر تیمور یولی انشاسی ایچون اناطولی عثمانلی تیمور یولی شرکته امتیاز اعطاسی ضمننده شرکت مذکوره طرفندن

تنظیم واعطا قلنان مقاوله و شرطنامه لایحه لری اوزرینه جریان ایدن
تدقیقات ومذاکراتی حاوی نظارت جلیله لرندن مبعوث ۲۸ رمضان
سنه ۳۱۹ تاریخلی ویوز التمش التی نومرولی تذکره ایله مذکور
لایحه لروخریطه وخط جوارنده مهاجرین اجنیه اسکان اولمیه جغه
داثر شرکت طرفندن یازیله حق مکتوب صورتی مجلس مخصوص
وکلاده مطالعه اولندی مذکور قونیه تیموریولنک بغداد وبصره یه
تمیدی الزم ومنافع ملکیه سی مسلم اوله رق سالف الذکر تذکره
آصفانه لرنده ایضاح اولندیفی اوزره کذرکاه ماده سی قومیسین
عسکری قرارینه مبتنی بولندیفی کبی نظارت جلیله لرلیله شرکت
اره سنده قرارلشدیریلان شرائط دخی تسهیل وتأمین انشا آتی
مستلزم تدابیری متضمن اوله رق یولنده کورنمش اولوب انحق
نظارت جلیله لرلنجه معرض تردده موضوع بحث ایدیلان مواددن
زیردن قدیمیه برشعبه وقدیمده برلیمان انشاسی خصوصی موقعا
شایان ملاحظه اولدنیفی کبی اورانک مستثنا طوتلسنده کی محذوردخی
حائز اهمیت ایدوکنندن آتیا حس اولنه حق حاله کوره ایجابنه
باقلمق اوزره بوماده نك تعدیلی موافق مصلحت کورندیکی وانقره
وقونیه خطلری مدت امتیازیه سنک بغداد وبصره خطی امتیازیه
برلکده طقسان طقوز سنه یه ابلاغنک دخی قیمت مالیه سی درکار
ایسه ده بغداد بصره خطی انشا آتنک جسامتیه برابر اشبو
تمدیدمده مقابل انقره وقونیه خطلرینک تقویه سی وتنظیم
اداره سی مصارفی بردرجه تنزیل وعسکری موقفلری وتفرعاتی
تأسیساتچون دخی درت مایون فرائق تخصیص ایتدیرلمش

اولسنه وايضای تعهد اولمديني حالده تعيين ايديلان معامله جزايه تأمين مقصده کافی بولمسنه کوره ايشک اصل مهم جهتی انقره وقرنيه خطرينک تقويه وتنظيمی مصارفنک بعدالتزويل بقيه سی اولان سنوی یدی یوز بيک فرائق ايله بهر کیلو متروسنه تأمینات اچقه سی اولمق اوزره ایستتیلان اون ایکی بیسک بش یوز فرائقک حد اعتداله تنزیلی خصوصی اوله رق مذکور تذکره والالرنده کوسترلديکی وجهله بو بایده شرکت مدیرلریله مباحثات ومذاکرات اجرا اولمش اولدینی حالده بعض اسباب درمیانله موافقت ایتماشیر ایسه ده بوماده نك قرارى حاصل واراده سنیه حضرت پادشاهی دخی اول مرکزده شرفصادر اولدینی تقدیرده هرصل اولسه بش یوز فرائق دهها تنزیل ایتدیريله جکی دلائل احوال وافادات ايله رهین اطمئنان اولدیغندن وخطک جسامتی جهتیله اختیار اولنه جق تکلفاته وخطوط موجوده نك تقويه سی ایچون لابد اولان مصارف زائده نه نظراً تأمینات اچقه سی اولان اون ایکی بیسک بش یوز فرائق ذاتاً قابل استکثار دکل ایکن بعدالقرار اندن ده بش یوز فرائق تنزیل ایتدیریلور ایسه برموفقیته اوله جغی کبی امر و فرمان هایون حضرت جهانبانی ايله دهها برشی تنزیلنه شرکتک موافقتی استحصال بیوريله جق اولور ایسه بودخی ضمیمه موفقیته اوله جغندن تأمینات اچقه سنجه دخی ترددی موجب برسبب قوی اولمديني اکثریتله تذکر و تأمینات اچقه سنک تقسیط سنویسيله ایشلتمه مصارفنک تسویه سیچون اقتضا ایدن تخصیصاتک دولت علیه نك بودجه سنده کی واردات حاضر مه طوقونلقسزین

واردات جدیدہ دن یا خود واردات حاضرہ دن تسویہ سی حکومت
 سنیہ نك اختیارینہ معلق بولندیغنه دائر شرکت مدیر لرندن برده
 مکتوب اخذ اولنہ رق لدی الاستیدان موجبہ ایفای مقتضیاتی
 خصوصہ ۶ شوال سنہ ۳۱۹ و ۳ کانون ثانی سنہ ۳۱۷ تاریخندہ
 ارادہ سنیہ حضرت خلافتناهی شرفتمعلق بیورلمش وعرض ایدیلان
 تأمینات اچہ سندن دها زیادہ تنزیلات اجراسنہ چالشلمسی المانیا
 سفیرینہ امر وفرمان بیوریلہ جغندن مذکور تأمینات اچہ سندن
 کیلومترو باشنہ ہر نصل اولسہ دها تنزیل ایتدیریلہ جکی سالف الذکر
 مضبطہ معروضہ مندرجاتندن بولسان بش یوز فراتک طرف
 دولترلندن تنزیل ایتدیرلمسی ومقاولہ وشرطنامہ ایلہ اوراق ملفوفہ
 سائرہ صورت مصدقہ لرینک تقدیم خاکپای عالی قلمسی جملہ
 امر وفرمان ہایون ملوکاندہ دن بولنش اولمغلہ اولوجهلہ ایفای
 مقتضیاتی خصوصہ ہمت بیورلمسی ومذکور مقاولہ وشرطنامہ واوراق
 سائرہ نك علی الاصول دیوان ہایون قلمنچہ معاملہ قیدیہ لری
 بعدالاجرا نظارت جلیلہ لرینہ کوندیریلہ جکی بیانیلہ تذکرہ ثناوری
 ترقیم قلمدی افندم .

فی ۶ شوال سنہ ۳۱۹ و فی ۳ کانون ثانی ۳۱۷

صدر اعظم

سعید

خلاصہ مارالبیان طقوز نادہ دن سکزینک حقیقتی وصورت
 عقد وتنظیمی تفصیلات آنفہ دن منقہم اولوب تأمینات اچہ سنک واردات
 جدیدہ دن ایفاسی وخطک نقطہ انتہاسنک حکومتلہ شرکت بینندہ

مذاکره تعلیق و دارالعجزیه سنوی بش یوز لیرا اعطاسی مجلس مخصوص وکلاجه قرارلشدیرلش وحتی موسیو زاندر موسیو هوکنن مجلس اوطه سنک یاننده کی اوطه ده بواندقلری حالده بوماده لره عائد اولان نتیجه مذاکرات او وقت وکلادن برذات ایله برابر مجلس وکلا قراری اوله رق مومی الیهامیه تبلیغ قلمش ویا لکنر خطک عدم انشاسی حقنده کی جزا مسئله سی صدارتجه تعیین ایدلش در .

ایضاحات واقعه ایله تحقق ایده یورکه مشارالیه سعید پاشانک طنین غزته سیله وقوع بولان وبعده خاطراته داخل اولان نشریات آتف الیانی ، بلکه بر اثر ذهول اوله رق ، واقع حاله موافق دکلدر .

* *

شمعی خاطر اتده مندرج وبکا متعلق دیگر مواددن شایان نظر اولانلری حقنده ده صره سیله عرض ایضاحات ایده جکم : سعید پاشا حضرتلری خاطر اتک جلد اولنده (صحیفه ۱۷۶ - ۱۸۰) امور عمومیه دولته عائد خدمت لری ذکر وتعداد بیوردقلری صره ده امور نافعه دن دخی بحث ایله روم ایلی التصاق خطک هیرشه یاپدیرلما سی ایچون صرف ایتدکلری مساعی مشمر اوله رق خط مذکور مرضیلری وجهله قونتواردده سقونتدن اقراض اولنان مبالغه ا کمال اولندقدن وکندی لری ده انفصال ایتدکن صوکره » کامل پاشانک زمان صدارتنده بر طرفدن مالیه ناظری ذهنی پاشا دیگر طرفدن ایشلدیجی قومپانییه وکالت ایدن ادملر بیننده ۱۵ شباط سنه ۱۸۸۶ تاریخلو بر مقاوله عقد اولنه رق خط التصاق ینه

هیرشله رفقاسی الیرینه کچدی ؛ شویله که : یوزده یدی فائض
بررأس المال اچمه سیله حکومت یکر می اوچ ملیون فرانق استقراض
ایدرك برطاقم شرائط وتعهدات جدیده تحتیه کیرمشدر حال بوکه
مذکور یکر می اوچ ملیون فرانق ذاتاً حکومتیه عائد وپارس وفلمنک
بانقه لرینه مودوع امانت اچمه سی ایدی ؛ تعبیر اخرله قومپانیه بزم
پاره مزى صورت اقراضده بزه ویرمش یعنی کنديسی مديون ايکن
دائن صفتی آلمشدر ؛ بوندن فضله استقراض مقاوله سی وسیله سیله
کیلو مترو باشنه حکومتیه عائد سکز بیک فرانق حصه واردات
بیک بش یوز فرانقه تنزیل اولمشدر ؛ نقلیات عسکریه اجر تنک
تاخیری تقدیرنده مقدما فائض ویرلمز ایکن استقراض مقاوله سنه
کرك وقت حربده کرك زمان حضرده وقوع بوله حق نقلیات
عسکریه ایچون فائض ویرلمسی تعهد وادخال قلمشدر ؛ عموم
خطوطک اکمال نقایصی عملیاتی - مقدما اوروپادن کتیریلان مهره
مهندسین طرفلرندن - بش ملیون لیرایه متوقف اولدیغنه حکم
اولمش ایکن اخیراً بوخصوصده حکومتک استقلالى فن قومیسوننه
شرکت طرفندن دخی اعضا تعییننه موافقت اولمشیهلله تحدید اولندیغندن
شرکت پک آزاچه صرف ایدرك يولك حقیقه تعمیرى تعهدندن
قورتلشدر ، حتی استقراض مقاوله سنک یدنجی ماده سنه عملیات
ناقصه نك مصارف اکمالیه سی مهایت اون میلیون بش یوز بیک فرانق
یعنی یدی یوز الی بیک فرانسر التونی درجه سننده اوله جغنه دائر
برماده صوقوشدیرلمشدر . « بیوریورلر .

ذکر اولمان مقاوله نامه عدلیه مستشارى واحان افندی یله

دیگر بعض حقوق شناسان معرقیتله تنظیم اولنه رق مجلس وکلاجه
بالمذا کره قبول ایدلمسی اوزرینه مالیه ناظری صفتیله طرفدن اصولاً
امضا اولمسنه منی وظیفه نظارته تعلق ایدن اقسامی حقنده ایضاحات
ویره جکم :

اولا شونی بیلمک لازمدرکه بو استقراضات زمان عقدنده بالعموم
اوروپاده کی فائض مقدارینه و دولت علیه جه اوندن اول و صکره
پایلش اولان استقراضات فائضلرینه نسبتله یوزده یدی فائض شایان
استکثار دکلدی. بر سطر اشاغیده کی «استقراض اولمان یکر می اوچ
میلیون فرانک ذاتاً حکومته عائد و پارس و فلسنک بانکله لرینه مودوع
امانت اچقه سی اولدینی و قومپانیه نك بزم پاره مزری صورت اقراضده
بزه و یرمش یعنی مدیون ایکن دائن صفتی آلمش بولندینی» ادعای ایه
حقیقتک ساده جه بر تأویل غریبیدر. چونکه اولاً: انشا آت شرکتک
— قبول قطعی اجرا ایدلدیکی زمان کوریه جک نواقصی اکال
ایده جکی حقنده کی — تعهداتک ایفای ایچون بانکیه تودیع و سعید
پاشانک حکومته عائد ظن ایلدیکی یکر می بش میلیون فرانک سکن برحق
میلیونی برخیلی زمان اول شرکتی اعاده ایدلمش و بقیه سنک مقدار
حقیقیسی تحویلات مرهونه نك تدنی قیمتندن طولای اون برحق
میلیون فرانقه تنزل ایلش ایدی. ثانیاً: بوباره انشا آت شرکتک مالی
اولوب بانکیه قونولمش بولمسی شرکتک ایفای تعهد ایده جکی حقنده
بر تأمین یعنی بر نوع رهن حکمنده ایدی. بودرلو تأمیناتی ایفای تعهد
مدتجه صاحبی ده کیف مایشا تصرف ایده مزسه ده اساساً صاحب
اولمان عاقد دیگرک کندینه مال ایدینه رک تصرفه قیام ایلمسی هیچ

بر زمان قابل دکلدر . بناءً عليه قومپانيه بزم پاره مزی صورت
اقر اضده بزه و یردی دیمک بروجهله طوغری اوله مز . حقیقت ایسه چوق
ساده در . قبول قطعی زماننده نواقصی اکمال ایده جگنی دیپوزیتو وضعیه
تأمین ایتمش اولان شرکت رهنی دیکشدریمک ایسته یور و دییور که
(استقراض مقاوله نامه سی ماده ۶) « ایشلدیجی قومپانیه اشبوماده
موجببنجه درعهده ایلدیکی تعهدک (اکمال نواقص تعهدی)
ایفاسی حکومت سنییه قارشى تأمین اولندیغنی مبین اولمق اوزره
زیرده محرر اوچ بانقه دن یغنی ویانه ده کی (ونیر بانق فراین) ویا
(انغلو اوتریشیان) ویاخود پارسده کی (بانق دوپاری نه ده پی با)
نام بانقه لر دن هانکیسنی انتخاب ایده جک اولور ایسه آنک طرفدن
حکومت سنییه نامه سفارت مشارالیه یاه (پارس سفارت سنییه سنه)
بر بیاننامه ویره جکدر مارالیه یان کفالت تعهد نامه سنک نمونه سی
اشبو مقاوله نامه یه ربط اولنمشدر .»

ارتق دوشونیه جک نقطه رهن جدیدک رهن قدیم درجه سنده
حکم وقوتی حائز اولوب اولمدیغیدر . بونده ایسه شبهه اولمیوب
هله بعده نواقصک بالا اکمال شرکتجه ایفای تعهد ایدلمش بولمنسی
سلامت معامله یه دلیل فعلیدر . شممدی فرضاً تأمینات تبدیل
ایدلماش اولسه ایدی شرکت ایفای تعهد ایتدکدن صکره بانقه یه
اولجه تودیع ایتمش اولدیغنی وسعیدباشانک « بزم پاره مز » دیدیکی اچقه
کیمه رجعت ایده جکدی . ؟ البته شرکتیه .

بوتون اعمالاتده آلان دیپوزیتو اچقه لری اکمال اعمالاتدن
صکره متعهده رجوع ایتزمی ؟ ارتق بوقدر واضح بر شیئی ده

زیاده ایضاحه چالیشمق بیهوده اولور ظن ایدرم .
 نقلیات عسکریه اجرتنک تأخری تقدیرنده مقدما فائض
 ویرلرلیکن استقراض مقاوله نامه سنده فائض اعطاسی تعهد ایدلدیکی
 سعید پاشا حضرتلری طرفندن بیان بیوریلیورسده فائضک نه قید
 و شرط ایله قبول ایدلدیکنندن و خصوصیه بوکا دائر اولان مادهنک
 فقره اولاسندن بوتون بوتون اغماض ایدلمشدر . بو خصوصه عائد
 مقاوله نامه ماده سی ده عیناً شووجهله در :

« بشنچی ماده — اشبو مقاوله نامه نك امضا ایدلدیکی کوندن اعتباراً
 کرك وقت حربده و كرك زمان حضرده وقوع بولاجق نقلیات
 عسکریه ۱۸ مایس سنه ۱۸۷۲ تاریخی شرطنامه ده کی تعرفه اجوراتنک
 نصفی رینه ثلثی ایله اجرا ایدیه جکدر . بری و بحری ضابطان و نفراتک
 تعرفه لرك تنزیلندن استفاده ایچون مأمور آسیاحت ایلدکلرینی مصدق بریول
 تذکره سنی ابراز ایللری لازم کله جکدر . قومپانیه نقلیات مذکوره نی
 اجوراتی بعده تسویه اولمق اوزره مقام سامی سرعسکریدن
 و یا مقام مشارانیجه حائز مأذونیت مأمورین طرفلرندن تسلیم
 اولنه جق مضبطه لر مقابلنده اجرا ایلکی تعهد ایدر . نقلیات مذکوره نك
 تسویه اجوراتی بروجه زیر اجرا ایدیه جکدر . شویله که : اوانسک
 برنجی ماده ده تعیین اولندیغی وجهله فائض ورأس المال اچقه سی
 بعدالاستیفا ماده سابقه حکمنجه الحاله هذه ایشلدلمکده بولنان
 خطوطک حاصلاتندن حکومت سفیهه عائد بولنه جق مبالغ متباقیه دن
 ایجاب ایدن مقدار نقلیات مذکوره بدلاتنک تمامی تسویه سنه
 تخصیص ایدیه جکدر . شاید مارالبیان مبلغ متباقی بر سنه ظرفنده

اجرا اولان نقلیات بدلنك تمامی تسویه سنه کفایت ایتیه جک اولور ایسه نقصانی سالف الذکر نقلیاته متفرع حساب سنوینك حین تقدیمده اكمال ایتمکی خزینۀ جلیله تعهداید و اكمال ایتدیکی تقدیرده مبالغ متأخره حساب مذکورك يوم تقدیمدن اعتباراً سنوی یوزده یدی حسابیله فائض کتوره جک و سنین آتیه بقیۀ حاصلاتندن واجب الادا اوله جقدر . »

کرچه بومادهیه کوره نقلیات عسکریه اجوراتی برسنه دن زیاده تأخر ایدر ایسه اندن صوکره سی ایچون سنوی یوزده یدی فائضه تابع اوله جقدر؛ فقط عینی ماده ده بالعموم نقلیات عسکریه اجوراتی نصفدن ثلثه یعنی یوزده اون یدی درجه سننده تنزیل ایدیلور که خزینۀ دولت ایچون جدی بر منفعت اولدینی بدیهیدر: بالفرض برسنه اجرتی سنه نهایتته قدر تأدیه ایدیله میهرک اندن صوکره برسنه ده تأخر ایدوب بوصورتله برسنه لک فائض ویرمك لازم کلسه بیله اوسنه ایچون ویریه جک فائضك عموم اجوراتك تنزیلندن حاصل اولان استفاده قارشوسنده اهمیتی جزئیدر .

بوندن صوکره ده عموم خطوطك اكمال نواقصی بش میلیون لیرایه متوقف ایکن استقراض مقاوله نامه سنك یدنجی ماده سنه مصارف اکیلیه نك اون برحق میلیون فرانق اوله جفته دائر بر ماده صوقوشدیرلدیغندن بحث بیوریلور .

سعید پاشا حضرتلری بونده ده بعینه نقلیات عسکریه اجوراتنه عائد ماده ده اولدینی کی مقاوله نامه موادینك برقسمندن اغماض ایتمك طریقنی اختیار بیورمشلردر . واقعا التنجی ماده ده : « بوکا

(یعنی دیپوزیتونك اعاده سنه) مقابل ایشلیدیجی قومپانیه انشاآت شرکئی معرفتیه یاپیش اولان خطوطك انشاآت شرطنامه سنه و حکومت سنیه جه مصدق خریطه و رسملره موافق برحاله افرانغی ایچون طرفیندن ایکیشر ذات انتخاب اولنق اوزره درت اعضادن مرکب برفن قومیسونی جانبندن لزومی بیان اولنه جق ا کمال نقایص عملیاتی اون میلیون بش یوز بیک فرانغه قدر اجرا ایتمکی ویا ایتدیرمکی حکومت سنیه یه قارشو تعهد ایدر تساوی آرا و قوعنده مذکور قومیسون اعضاسی جانبندن اهل و مراتب علیا اصحابندن بیغرض بر ذات اوچنچی حکم صفتیه تعیین اولنه جق وانك ویره جکی قرار طرفین ایچون مجبوری اوله جق و قومپانیه طرفندن موقع اجرا یه قونیه جقدر « قید تحدیدیسی واریسه ده یدنجی ماده ده : « بالاده محرر قومیسونك ا کمال نقایص عملیاتی حقنده کی تخمینی اون میلیون بش یوز بیک فرانق تجاوزه ایده جك اولور ایسه ایشلیدیجی قومپانیه عملیات مذکوره یی بر صورت غیر محدوده ده اوله رق هر نه مقداره بالغ اولور ایسه اولسون اجرا ایتمکی تعهد ایدر . « و سکننجی ماده ده : « ا کمال نقایص عملیاتنه دائر التنجی و یدنجی ماده لرده محرر اولان تعهداتدن بشقه ایشلیدیجی قومپانیه ایشلتدیکی خطلرك و یانه ده منعقد حکومات اربعه قونفرانسی معرفتیه ۹ مایس سنه ۱۸۸۳ تاریخنده تنظیم قلمش اولان مقاوله نامه موجبنه قرارلشدریلان احکام فیه یه موافق برحاله ایفا و یا خود عندالحاجه او یله برحاله افرانغ ایتمکی و بونك ایچون حکومت سیه دن برکونا تأدیات ویا تضمینات طلب ایتماکی درعه ده ایدر . »

دینلەرک ایشلیدیجی قومپانیه اکمال نواقص ایچون صورت غیر
محدوده قبول مسئولیت ایلش وویانه قونفرانسی مقرراتنک
اجراسی احکامنی ده صریحاً و قطعاً درعهده ایتشدیر .

ایشته صراحةً اکلاشیلیورکه شرکت بومقاوله ایله سعید پاشا
حضر تلرینک ادعاسی کی « یولک حقيله تعمیرى تعهدندن قورتلش »
دکلدر . بوراده برده کویا تعیین نواقص ایچون تشکیل اولنه جق
فن قومیسسیونه شرکت طرفندن دخی اعضا تعیننه موافقت اولنسی
حکومتک استقلالنی تحدیدایتدیکی ادعا ایدیلیور . حال بوکه طرف
دولتدن هر نه صورتله اولور ایسه اولسون تعیین وارانیه اولنه جق
نواقصه شرکت طرفندن قبول ویا اعتراضی متضمن جواب اعطاسی
حق هیچ بر زمان شرکتدن نزاع ایديله مز . شرکتک صکر ددن
بویله بر جوانی ویرمسيله ایشک اثنای تدقیقنده نقاط نظارینی سویلیسی
آرمنده استقلال دولتی تحدید ایده جک برفرق اولوب اولمادیغنی
ارباب عقول تمیز ایدیر . بومقاوله نامه نك بوکا دائر اولان فقره سی
بالاده عیناً مندر جدر .

سعید پاشا حضر تلرینک دولته عائد حصه و اردات بختنده
« استقراض مقاوله نامه سی وسیله سیله کیلو مترو باشنه حکومتیه عائد
سکزیبک فرائق حصه و اردات بیك بش یوز فرانقه تنزیل
اولنشدیر . » قولی ایسه مشارالیهک کندی حقنده ینه کندی
طرفندن مؤاخذه دیمک اولویور؛ چونکه: تنزیل عائدات مشارالیهک
زمان صدارتنده، هنوز صدارت مستشارلغده بولندیغم صره ده، تنظیم
و کندی مهر یله ده تختم ایدلش و اراده سنیه یه اقتران ایتش اولان

۱۸ رجب سنه ۱۳۰۱ و ۱۰ مایس سنه ۱۳۰۰ تاریخلی مجلس وکلا مضبطه سیله قبول اولمش ؛ بومضبطه ایسه باب عالیجه هیرش ایله بالخباره حاصل اولان ائتلاف اوزرینه تنظیم ایدلمشدر . مضبطه نك بوخصوصه دائر فقره سی بعبارتها شودر :

« موجود مقاوله نامه نك اوچنجی ماده سنده ایشلدیجی شرکتنک مستأجری بولندیغی خطوطك تعیین اولنان مدت موقتہ نك ختامندن برسنه صوکره بهر کیلومتروسی ایچون سکزی بیک فرانق تأدیہ اولنه جنی محرر اولوب شرکت اشبو بدل ایجارك تأدیہ سی بعض شرائطه معلق اولدیغی وشرائط مذکورہ موقع اجرایه قولنامق مناسبیتله مبلغ مزبوری ایفایه مجبور اولدیغی درمیان ایدرك شمدی یه دکن براچه آله مامسیله کچن مدت بدل ایجاری دعاوی ماضیه عدادینه کیرمش ایسه ده بعد ازیں ایشلیه جك بدل ایجارك تعیین واستیفاسی خصوصنك دخی دعاوی ماضیه حقنده ویریله جك قراره تعلیقی برمدت ده شرکتنک مستفید و حکومت سنیه نك متضرر اولمسنی انتاج ایدہ جکی جهتله یالکز کچن مدت معاملاتی بشقه جه یا صلحاً ویاخود حکماً تسویه اولمق اوزره بوندن بویله کی مدت حاصلاتندن حکومت سنیه جه دخی انتفاع واستفاده ایدلمسی خیرلو کورینوب بدل مذکورك تعیین مقداری ایچون برمقیاس آرانلدقده تیمور یوللارك حاصلات عمومیه غیر صافیه سی محاربه زائله مدتی مستثنا اولمق اوزره شمدی یه دکن کیلومترو باشنه حد متوسط اوله رق اون بیک فرانقه بیلہ بالغ اولمدیغی نافعہ نظارتی محاسبه سننده کی قیوددن تبین ایتدیکی نافعہ

نظار تندن بیان اولمسیله حکومت سنییه ایچون حاصلاتدن بر حصه مناسبه افراز واعطاسی لازم کلسنه بناءً مقاوله جدیده نك تاريخ تعاطیسندن اعتباراً حاصلات عمومیه غیر صافییه سندن کیلومترو باشنه خدمتوسط اوله رق شرکت ایچون سنوی یدی بیک فرانقه مساوی بر مبلغ افراز اولندقدن صکره باقیسنك یوزده الی بشی شرکته و قرق بشی بهر سنه ختامنده بدل ایجار اوله رق حکومت سنییه عائد اولمقله برابر حاصلات واقعه هر نه مقداره بالغ اولور ایسه اولسون کیلومترو باشنه سنوی هر حالده و اقل مقدار اولمق اوزره بیک بش یوز فرانقك حکومت سنییه تأدیه ایدلمسی وحسابات قطعیه نك سنه ختامندن اعتباراً اوچ ماه مدت ایچنده اعطا اولمسی قرار - اشدیر یله رق مقاوله جدیده نك ایکنجی ماده سی بوقراره کوره تنظیم ایدلمشدر .

یابیلان معامله استقراضیه دائر اولوب کامل پاشا حضرتلری صدارتنده تنظیم اولنان ۱۳ ربیع الاول سنه ۳۰۳ و ۸ کانون اول سنه ۳۰۱ تاریخی مجلس وکلا مضبطه سننده ینه سعید پاشا حضرتلرینك زمان صدارتلرنده اتخاذ بیورلمش اولان قراره بنای معامله ایدلمشدر که ذکر اولنان مضبطه نك بر فقره سننده: « قومپانیه نك تقسیم حاصلات بختنده شرائط معروضه دن بشقه بر صورت تسویه اماله سی قابل اوله مدینی کبی اشبوصورت تقسیمک اساسی مجلس عاجزانه مزك تحت اراده سنیه ملوکانه ده بولنان قرارینه موافق اولوب » دینمش وایشته تحت اراده سنیه ده بولنان بوقراره - که حاصلات صافییه نك الی بش، قرق بش نسبتنده تقسیمی وحکومت حصه سنك اقلی بیک

بش یوز فرانق اعتبار ایدلمسیدر — مشارایه سعیدپاشا حضرتلری زمان صدارتنده کی مجلس وکلا مضبطه سنک جمله مندر جاتندن بولمشدرد. مع مافیه ایوم حاصلاتک یوزده قرق بشی حسابیله بیک بش یوز فرانق رینه کیلومترو باشنه التی یدى بیک فرانق التمقده در .

خاطر اتده بوسطرلری متعاقب موضوع بحث اولان هیرشده کی مطلوبات سابقه مسئله سنه عاڈ مذاکرات باب عالی ایله هیرش بیننده جریان ایدرک بالاخره حکمله بیترلمش اولمسندن طولای سعیدپاشا حضرتلری بالطبع اساسی حقنده برشی دیمیه رک فقط حکمک برمیليون درت ویابش یوز بیک لیر احکم ایتمنی استصغار ایله بومقدارک آزلغنه استقراض مقاوله نامه سنک سبب اولدیغنی اتیان ایده یور. شاید بوادعا موافق حقیقت ایسه مسئلیتی استقراض مقاوله نامه سنه دکل بیک بش یوز فرانق قبولی قرارینی متضمن اولوب برقره سی بالایه درج ایدیلن وسعیدپاشا حضرتلرینک زمان صدارت لرینه عاڈ اولان ۱۸ رجب سنه ۳۰۱ تاریخلی مجلس وکلا مضبطه سنه راجع در .

استقراض مقاوله نامه سنک بالاخره حکم واسطه سیله حل اولنان مطلوبات ماضیه مسئله سنه تعلق ایدیه جکی مذکور مقاوله نامه نک بروجه آتی صراحتی حائز اولان طقوزنجی ماده سیله ثابتدر : « طقوزنجی ماده — طرفین معاقدین بیننده برطاقم مطالب واختلافات موجود اولدیغنه مبنی اشبو مقاوله نامه نک کاملاً محافظه اولنان وقرباً بتکرار مذاکراتنه کیریشه جک هیئت حکمیه معرفتیه تسویه سی مقرر اولان مطالب واختلافات مبحوثیه اصلاً ایراث خلل ایتمیه جکی قطعاً بیان اولنور شوقید صریح احترازی ایله که

اشبو مقاوله نامه دن مقدمکی مدت ایچون طرفینک حال و موقعی
بلا تغیرینه باقی اوله جقدر . »

خاطر اناک جلد ثانیسنده یینه بوجمه عائد اولان سطر لر (صحیفه ۶۵)
اولکی سوزلری شکل دیکرده اجمالاً تکراردن عبارت اولمسیله
مستغنی تذکاردر .

*
* *

سعید پاشا حضرتلری حجاز تیمور یولندن ده بحث ایدرک خطک
نقلیاتجه فائده سی اولمیه جغنی ، حرکات عسکریه جه ضرر تولید
ایده جکنی سویلیور . حجاز تیمور یولنک انشاسی بوکون انظار
عالمده تحقق ایتمش بر موفقیات اولوب مشارا ایهک خطک فائده سزلکی
حقنده کی فکری هنوز خط لایقوله ایشدیله مدیکی حالده بیله اوچ
یوز یکر می آلتی سنه سنده غیر از مصرف طقسان آلتی بیک بش
یوز لیرا حاصلات صافیه آلمش اولمسیله بالفعل مجروحدر . حرکات
عسکریه جه ضرر تولیدینه دائر اولان مطالعه ثانیه حقنده ایسه
نوز سویلیه بیلیمک صلاحیتی حائر دکل .

سعید پاشانک حضرتلری بوندن صکره خطک مصارف انشائیه سنی
استکثار ایدرک دیورکه « عملیات ترابیه یی عسکر یاپدینی نظر
ملاحظه آئیر وممالک سائرده طرق جدیدیه وقوع بولان
صرفیات ایله مقایسه اولنورسه فحش مصرف دفعه تحقق
ایدر . » حجاز تیمور یولی لایحه سی نامیله بالتنظم طبع ونشرو مجلس
مبعوثانه توزیع وتودیع اولنان وایشک هر جهتی مبین ومجلسجه

مصدق بولنان لایحه مفصله نك انشاآته دائر فقره سی بواسنادہ
 جواب کافی اولدینی جهتله بورایه عیناً درج ایدہ یورم :

« امدی خطك مدینه منوره یه قدر (۱۶۱ کیلو مترو)
 طولنده اولان حیفه شعبه سیله برابر مجموع طولی (۱۴۶۴) کیلو
 مترویه رسیدہ اولوب مصارف انشائیہ مجموعی اولان [۳۰۶۶۱۶۷
 لیرانك] خطك مجموع طولنه تقسیمی نتیجه سنده مناعت موقعیه سی
 حسیله مصارف کلیه اختیار اولنان حیفه خطی شعبه سیله برابر، بریری
 اوزرینه، خطك بهر کیلو مترو سنه [۲۰۹۴ لیرا] اصابت ایدر .
 اشبو خطك مصارف انشائیہ سیله امتیازی شرکتلر طرفندن ممالک
 عثمانیه ده یاپیلان شمندوفرلر ارسنده بر مقایسه اجرا ایدیلہ بیلیمك
 اوزره اول امرده حجاز تیمور یولنجه بر عسکره نقد ریومیه و مذکور
 شرکتلرجه بر عملیه قاج غروش اجرت ویرلدیکنك تدقیق
 و مقایسه سیله حجاز تیمور یولی مصارف انشائیہ سنك نه درجه ده تراید
 ایدہ جکی اکلاشیلور . امدی محاندن مورود راپورلره نظر آبر آی
 ظرفنده بر نفره یوز غروش قدر اجرت و ضابطانه معاشلرینك
 ثنائی و بعضاً بر مثلی درجه سنده اکرامیه اصابت ایلدیکی مستبان
 اولمنه کوره ضابطلردن قطع نظر بر نفره آیدہ یکرمی التی کون حسابیلہ
 کونده درت غروش ویرلمش اولور . ممالک عثمانیه ده کی تیمور یولی
 شرکتلری عملیه ییدی سکنز غروشله استخدام ایلدکلرینه نظر آ
 بوشمندوفرله مقایسه ایچون عملیات طاہورلرینه ویریلان و سالف الذکر
 محلی صرفیاتی میاننه داخل اولان [۱۹۰۷۵۹ لیرانك] تضعیفی
 و برده خطك مدینه منوره یه قدر اولان قسمنك اکمال نواقصی

ایچون صرفی تخمین اولنان [۲۰۰,۰۰۰ لیرانک] ضمی ایجاب
ایده جکندن شو حالده سائف الذکر مصارف انشائیہ مجموعی اولان
[۳۰۶۶,۱۶۷ لیرا] [۳,۴۵۶,۹۲۶ لیرایه] بالغ اوله رق اشبو
مقدارک خطک مجموع طولنه تقسیمنده بهر کیلو مترو سنه [۲,۳۶۱
لیرا] ویا معادلی اوله رق [۵۲,۰۰۰ فرانق] اصابت ایتدیکی
کوریلور که بومقدار شرکتلرجه صرف اولنان مبالغه نسبتله چوق
اهون اولقله برابر حجاز خضنک موقعنک ایجاباتندن اولمق اوزره
تکمیل مالز مه سی نقلیاتنک بر نقطه دن سوق وانشا آک کذلک بر
نقطه دن تعقیب اولنسی و خط بوینده صویک فقدانندن ناشی عملیات
طابورلرینه وبالعموم مستخدمینه و حتی بعض موقعلرده اعمالات
صناعیه خرجلرینه مقتضی صویک دوه ویا ترن ایله نقل ایدلمسی
کی مصارف زائده ضروریه وقوعی نظر اعتباره آلدیغی حالده
صرفیاتک ازهر جهت اعتدالی اکلا شیلور . شو کوستریلان رقلر
قیود واوراق مثبتیه مستند اولوب دفتر کیردن استنساخ اولندیغنه
ودفتر کیر ایسه هان جلب وتدقیق اولنه بیله چکنه نظراً مغایر
حقیقت اوله میه جغندن و ایراد ایله مصرفک فرقی موجود صندوق
تشکیل ایده جکندن موجود ایسه اکسیک حقیقدیغی حالده مسئولیت
شدیدی داعی بولانه جغندن مصرفک بر قسمنک داخل قید
ایدلماسی احتمالی بولمادیغی جهتله دفترک یا کلش اولدیغی ده فرض
ایدیله میوب بنساء علیه بوارقامی قبول ایله خطک بالنسبه اوجوز
یاپیش اولدیغی تسلیم ایدیلور ایسه ده بویاپیلان خط مقایسه ایدیلان
وشرکتلر جانبندن یاپدیریلان خطر کی اولوب اولمادیغی شایان

تدقیق بولندیغندن اجنبیدن، یرلیدن خطی کورمش اولانلرک افاده لری
انشا آتک لهنده اوله رق مقدا کوندرلش اولان وبوکره تقدیم
قلنان البوملرد ه دخی کوپری وسائره وسملری برمتانت اظهار ایتمکده
ایسه ده بویله اوچ بچق ملیون لیرالق برایشده نه یولجیلرک افاداتی
ونه ده فطوغرافک منظره سی حصول قناعته کافی اوله میه جنی
ملاحظه سنه کوره ایستلیدیکی حالده برهیئت فنیه اعزامیله خطک
صورانشائیهنسک وقولانیلان لوازمک جنسنک واما کن موجوده نک
والحاصل بالجمله تفرعاتک مشهودات اوزرینه تدقیقی برقات ده
موجب تأمینات اولور . »

بوتفصیلات وخط اوزرنده ارباب فن طرفندن مکرراً اجرا
اولنان تدقیقات سعید پاشا حضر تلرینک « فحش مصرف دفعه
تحقق ایدر » حکم قطعینسنده کی عدم اصابتی صریحاً اثباته کافیدر .
مشار الیهک بونی متعاقب ایراد ایتدیکی « وارداتنک اداره سنه
کلنجه شعائر اسلامیه دن اولان برقریضه نک ایفاسنی تسهیله مدار
اولدینی ایچون اقطار اسلامیه دن برچوق اعانات کلکده در . حال بوکه
حسابلری قاعده مؤتمنه تحتنده دکل ؛ قومیسونی تشکیل ایدن
ذواتدن بحریه ناظرینک حالی و مشاغل سائره سی بویله شیلرله
اشتغاله مساعد دکل ؛ مرجع تدقیق اوله رق میدانده یالکز ذهنی
وعزت پاشالر قالیورلر ؛ انلرایسه ده برچوق ایشلرله مکلفدرلر ؛
بیلیم که بوذاتلرک وقت ودقتلری حجاز اعاناتی مقبول بریولده
جریان ایتدیرمه نظارته کفالت ایدرمی ؛ شوخصوصلر حقنده کی
خاطراتی حضور عالییه عرض ایتدم اما علائم قبول ظاهر اولدی . »

عباره سی طوغریدن طوغری یه یاقیشقسنز بر تعرضی احتوا ایدیور .
 حال بوکه حجاز خطنک واردات و مصارفنک اخذ و صرفی هیچ
 بر زمان قومیسون عالی طرفندن اجرا ایدلیوب بدایه مالیه
 ناظرینک ریاستنده براعانه قومیسونی احداثله اکا ومؤخرآ تشکیل
 اولنان اداره مالیه نظارتنه تودیع ایدلمش اولدینی معلوم و محقق
 بولندیغندن سعید پاشانک اعانات حساباتی اسملرینی تعداد ایتدیکی
 اوچ کشینک النده ظن ایتسی پک اچیق بر غفلت و سرد ایتدیکی
 ایهامات ایسه موجب اسف و حیرتدر .

حجاز خطی اداره مالیه سی نظارتنک حساباتی الیوم مالیه
 مستشاری اولان و اوزمان اداره مالیه محاسبه جیلکنده بولنان
 رشاد بکک همیله غایت منتظم جریان ایتمش و دیوان محاسبه مصدق
 اوله رق اخیراً مجلس مبعوثانجهده تدقیق ایدلمشدر . مع مافیه
 بالاطراف حقیقت حالی بیلیمک ایستیانلره ، حجاز تیموریولی لایحه
 مطبوعه سنه مراجعتی توصیه ایله برابر ، لایحه مذکورنک
 تشکیلات اداره فصلندن بر قسمنی بورایه نقل ایده یورم :

« قومیسون عالی اچیه ال سورمامک شرطیله کافه امور
 و معاملاتک مرکز و مرجعی اولوب وظائفی خطنک انشاآتیه
 واردات و صرفیاتنه و ایشلتمه امورینه تعلق ایدن هر درلو ماده
 شامل و بناءً علیه مصارف انشائی قارشولنی اوله رق تدارک و احداث
 اولنان وارداتک صورت استیفاسی و اعاناتک ترتیب و توزیعی و انشات
 و ایشلتمه اداره لری ایچون رای ، تراورس ، لوموقوتیف ، واغون
 و فابریقه ادواتی کبی ادوات حدیدیه و کیرچ و چنتو وسائر مثله

لوازم انشائیہ نك مناقصہ و مبايعہ و مقاولہ نامہ لرینك عقد و تعاطیسی و مهندس و سائر فن مأمور لرینك تعیینیہ معاشر لرینك تخصیصی و سوریہ دہ کی انشاءات ادارہ سی نامہ قرہ دی کشادی وایشلمتہ بودجہ سنك تصدیق و بونلردن محتاج استیذان اولان موادك عرضی و امر ادارہ یہ متعلق دوائر و ولایات و سوریہ قومیسسیونی انشاءات وایشلمتہ ادارہ لری و ادارہ مالیہ نظارتیہ مخبرہ اجرایی کی معاملات اساسیہ عائد اولوب اوروپا فابریقہ لرینہ سپارش اولنان ادوات حدیدیه و سائر نك احكام مقاولاتہ توفیقاً معاینہ لرینی اجرا و ضبط نامہ لرینی تنظیم و اسرار و وظیفہ سیلہ مكلف اولہ رق اوروپایہ اوچ مهندس اعزام ایدلمش و اشبومعاینہ ہیئتندن كلہ جك راپور لری تدقیق و مطالعات فنیہ سنی درمیان ایتك اوزرہ قومیسسیون عالی نزدندہ مأمورین نافعہ دن بردہ هیئت فنیہ احداث اولنمشدر .

قومیسسیون عالی تعقیب تحصیلات حقندہ ولایاتہ اجرا ایتدیکی و صایادہ اچہ نك اعانہ قومیسسیوننہ و مؤخرأ انك یرینہ قائم اولان ادارہ مالیہ نظارتنہ کوندرلمسنی تأیید و تصریح ایلدیکی جهتہ ارسالات نقدیه ابتدا اعانہ قومیسسیوننہ و بعدہ ادارہ مالیہ نظارتنہ ورود ایدرك مقبوضلری اورادن کوندرلمكدہ بولنمشدر .

قومیسسیون عالینك ایفا ایتدیکی وظائف میانندہ اصل شایان تدقیق اولانی مبیعات و سپارشلردر . قومیسسیونجہ مبايعہ اولنان اشیا باشلوجہ ایکی قسمہ تفریق اولنہ بیلور : برنجیسی ری و تراورس و ادوات محرکہ و متحرکہ کی قیمت جسیمہ یی حائر لوازم اساسیہ در . بونلر ایچون اعلانات اجرا و مناقصہ کشاد ایدیلهرك تقرر ایدن

فیثات و شرائط اوزرینه مقاوله نامه لری تنظیم و تقدیم ایله اراده
سینه سی استحصال اولنور ایدی . اشبو مبايعات ائمانندن اوچ
ربغنی تشکیل ایدن رای و تراورسلر پیاسه یه تابع موزون ائدن اولمسنه
وبلیچقا و المانیاده و سائر مراکز مهمه ده هر کونک چلیک پیاسه لری
محفوظ بولمسنه نظراً لای الايجاب زمان سپارشلرینه مصادف
پیاسه جدوللرینک جلیله تدقیقات اجرایی ده قابلدر . ایکنجیسی
شامده و بیروتده بولنه میان بعض متفرق اشیادر که بونلرده درساعات
پیاسه سندن و قومیسسیون عاینک مأمور مخصوصی طرفندن آئمش
اولوب انلرک جزئیاتی و امثالک هر زمان پیاسه ده موجودیتی حسیله
تدقیق و تطبیق آساندر .

سعید پاشا حضرتلری برده «ینه حجاز شمنند و فری و ذهنی پاشا ایله
مکالمه » سرلوحه سی اتتنده بر صحیفه یازمشلردر . بونده : «یوقاریده
بیان اولنان تدقیقاتدن براز زمان صکره ایدی که حجاز طریقته
اعانات و صرفیاتی حاوی اولان اجمال قومیسسیونک عرض و افاده سی
اوزرینه باش کتابتدن تذکره ایله باب عالی یه کلدی ؛ بواجمالک
ارسالی مجرد بر بیان حال قیلندن ظن ایتمشیدم مکر مقصد اودکل
ایمش . و رود تذکره دن اوچ کون صکره نافع ناظری ذهنی پاشا نزدیمه
کلدی ؛ عزت پاشانک سلام و کلامنی تبلیغدن صکره اجمالک مندرجاتی
تصدیقاً صدارتدن بر تذکره رسمیه عرض اولمسنی پاشا ایستیور ؛
فقره سنی خلاصه مطلب اوله رق بیان ایتدی ؛ حقیقه قناعت کیمیان حسابی
تصدیق ایتک قابل اختیار برشی اولمدیغی جهتله سکوت ایتدم » دید کدن
صکره بوالتماسی اوچ دفعه تکرار ایتمش اولدیغی بیان بیوریورلر ؛

یالکز بردفعه کندیلرینه — اجمالک تصدیقنی عزت پاشا جایدیور —
 یولنده برشی سویلدیگمی تخطر ایددیورم . عزت پاشانک بوطلبنه
 سکوت ایله دکل پک نازکانه برلسان ایله مقابله بیورمشلردی؛ بوده
 خاطر مده در . بشقه برشی سویلدیگم شیمدی خاطر مه کلور سده
 حجاز خطنک مکافات اخرویه یی مستلزم اوله جغنی سویلمش اوله بیلیرم؛
 بونده شایان دقت برشی کور میورم . فقط مشارالیه سعید پاشانک
 اوزمان تفکر ایتدیکی بوسوزی صرف ایتک ایچون تا خاطر اتک
 نشرینه انتظار بیورمسی جالب نظر اولمق لازم کلیر؛ اصل جای
 تعجب اولان نقطه ایسه صحتته قناعت ایدیله میان بر حسابی مثلاً دیوان
 محاسباته حواله ویا مخصوص بر قومیسون تشکیلله اکا تودیع ایدرک
 قناعتسزلکی تولید ایدن اسبابی اظهار ایتک یرینه سکوت بیورلمش
 اولمیسیدر .

*
 * *

مشارالیه بعض ذواتک مکرر و بعض ذواتک آیریجه خزینة خاصه دن
 معاش آلدق لریخی بیان ایدرکن هم نافعہ نظارتندن هم مأمورین
 ملکیه قومیسونی ریاستندن معاش آلدیغمی ده [خاطرات جلد ثانی
 صیفه ۱۴۵] اشارت بیورمشلردر .

مابین هایوندن معاش وعطایا آندم . مأمورین ملکیه قومیسونی
 ریاستی ده عهدۀ عاجزانه مده قالمق اولمق اوزره تجارت و نافعہ نظارتنه
 مأموریتده ایکی معاشک ده آلمسی اراده بیورلمش و آنک اوزرینه یالکز
 بر معاشک کفایتی امرنده واقع اولان مراجعات عاجزانه مه الیغم جوابلره

نظر ابوبابده دها زیاده اصرارک حقمده مضراوله جفی اکلشلمسی
اوزرینه اختیار مطاوعت اولنش ایدی. فقط بر مدت قصیره دن
صکره تشکیل اولنوب ریاستی عهده مه تودیع بیوریلان مالیه
قومیسوننک یارنجی یاخود ایکنجی مضبطه سیله بالذات واقع اولان
تشبث و تکلیف عاجزانهم اوزرینه بالعموم معاشات مکرره کبی
شایان بحث کوریلن معاش ده قطع و ترک ایدلمشدر. بومعامله رسمی
وتاریخی ده مضبوط اولدینی جهتله تحقیق آساندر.

*
**

خاطراتک جلد ناینسده [۳۷۴ - ۳۷۵] بحث اولتان حیف
تیمور یولیه سهواً حما - ریاق دینیلن شام - مزیریب خطنک
اشتراسی خصوصصری خارجیه نظارتنک توسططیله مجلس وکلاجه
اجرا ایدلمشدر. قومپانیه طرفندن اجرای مذاکره یی سفیر
درعهده ایدرک طرف دولتدنده خارجیه ناظری مأموریورلمش
ایدی. حتی خاطراتده « برده بویوله بزم طرفدن بر آره لق یوزاللی
بیکنک لیرا تکلیف اولنش اولدینی خارجیه ناظری توفیق پاشانک
ویردیکی معلوماتدن استخراج ایلدم » دینلمسی ده بوکادلیلدر.

بوایش ایچون چالشمش اولدیغم غیر واقع اولدینی کبی « ذهنی
پاشا بوطریق حکومتہ ترک ایچون اوچ یوزبیک لیرا ایستلیدیکی
وروش حاله کوره تنزیلات اجراسی ده قابل اوله میه جفی سویلیدی
دینلمسی ده بنجه موجب استغراب اولمشدر؛ چونکه بویوله سوز
خاطرمه کلیدیکی کبی مذاکره یه ده بن مأمور دکل ایدم. اگر خاطراتک
بوابده کی حکایه سنک اقسام سائرهمی موقوفه موافق ایسه بوخط

ایچون شرکت طرفدن اوچ یوزبیک لیرا ایستلمش. صکره طرف شاهانه دن سفیر توسیط اولنمش. فیاتی ایکی یوزبیکه تنزیل ایتش ؛ خارجیه ناطری یوزاللی بیک لیرا تکلیف ایتش ونهایت بوایکی فیاتک وسطیسی اوزرنده ائتلاف ایدلمش اولور. بوتون بومعاملات علم و دخنم خارجنده جریان ایتش اولدیغندن حقیقت حال بنجه مجهولدر .

*
* *

سعید پاشا حضرتلری خاطر اتک جلد نایبسنده (صحیفه ۳۸۱)
افیون قره حصارى خطی ایله از میر شمندوفرینک الصاق ایدلمشی
هر نقطه نظر دن موجب فوائد اوله جغندن بو خطک تمیدی خصوص-
صنک باب عالی یه انهاسنه مسارعت ایدلمشی لازم کله جکنی بکا سویلیدیکی
وبونی تصدیق استدیکم حالده هر نصلسه فعلیاتی تأخیر ایلدیکی بیان
بیور مشلر. نافعہ نظارتنه ایکنجی دفعه تعیینمندن مقدم اکال ایدلمش
اولان بو خط افیون قره حصارى خطیله الصاق ایدلماش و بوکا
کویا درس هادتک تجارتی خللدار اوله جنی بهانه ظاهریسی سبب
کوسترلمش ایدی . نظارته مأموریتی متعاقب بو خصوص ایچون
تشبثات مکرره ده بولندم. فقط نهایت اولجه برذاتک «باندومه خطی
انشا ایدیلیر ایسه بوغازلرک محفوظیتی خللدار اوله جنی» حقه ده کی
معروضاتی خاطر عالیده جایکی اولدیغندن نزد شاهانه ده عینی
محدوری مستلزم کورینان بوالصاقه مساعدده بیورلمیه جنی بالواسطه
قطعياً تبلیغ قلنمش و بناءً علیه نظارتجه یکیدن برمعامله یه تشبثه
امکان قالمش ایدی . یوقسه التصاقک محدود تجاریسنه هیچ
کیمسه قانع دکلدی. مشارالیه بو خطک التصاقی مسئله سنی طوغریدن

طوغری به عرض ایله مساعدۀ سنیه استحصال بیورمش اولسه لر
ایدی تأخر واقعه امکان قالمز ایدی .

*
**

سعید پاشا حضرتلری ریختملرک مبايعه سی تشبثی حقنده دخی
خاطراتنه برخیلی سوزلر ادخال ایتشدیر . ریختملرک مبايعه سی
طرف پادشاهیدن شدتله آرزو بیورلمقده ایدی . سعید پاشا
بو آرزوی اسعاف ایتماک ایستدیکنی اکلاقمق ایچون مضبطه
مسوده سنه بالاخره ایشی اشکال ایده جک برفقره صیقیشدیرمش
اولدیغنی و شرکت نامنه ویريله جک سنده شرکتجه ایفاسی قابل
اوله میه جق شرائط حقوقیه وضع ایتدیردیکنی سویلیور .

فقطدها اول یازیلان مضبطه ده شیخ الاسلام جمال الدین افندی
وعدلیه ناظری عبدالرحمن پاشا حضرتانک مخالف قالدقلمق بیان
ایده یور . آرزوی عالی شایان اسعاف دکل ایسه وکلادن ایکی ذات
مخالف ایکن عجبا کندیلری نه ایچون قبول رأینی درمیان بیوردیلر؟
خاطراتده بوراسی مذکور دکلدر . نته کیم مشارالیهک انفصالندن
صوکره وقوع بولان تشبثات و معروضات اوزرینه ذات شاهانه جه
ریختمک مبايعه سنندن صرف نظر بیورلدی .

بوتون بوقیل وقال ایچنده بکا عائد اولان جهت شوققره در:
« ریختیم باش مهندسی چنغریا طرفندن ممضی خریطه حقنده رسومات
مأمورلرندن علی رضا بك بعض ایقاظاتده بولندی - که سزای
دقت و دولته خدمتدر - خریطه یه نظراً ریختیم شرکتته عائد
اراضینک مجموع سطحی (۳۱,۴۰۰ مترو مربعدن) عبارتدرکه

مساحهٔ تربيعيه سى (۶,۰۱۶ مترو) اولان ريختيم ايله (۱۳,۱۰۰ مترو مربع) سطحنده اولان زقاقلر بومقدارده يعنى (۳۱,۴۰۰ متروده) داخلدر .

حوليلر داخل اولدينى حالده غلطه كمر كنك مساحهٔ سطحيه سى (۵۱۸ مترو مربعنده) در . بو اخطارات اوزرينه رسومات اداره سنده دخی مأموريتى اولان موسيو والورى يى ريختيملرك مساحه سنه مأمور ايتدم ؛ مومى اليه ۲۱ ايلول سنه ۱۹۰۲ تاريخيله تنظيم وامضا ايتديكى تقريرنده على رضا بكك اخباراتنى تصديق ايتشدر . بوايسه نافعہ ناظرينك مجلس وكلاده بيان ايتديكى (۳۲۰۰۰ ذراع) مقدار مساحه يه مخالفدر كه عرصه لرك مجلسه سويلانلار ذراعى مساحهٔ صحيحه يه نسبتله (۱۴,۵۳۴ ذراع) فضله در . بونلرك ائمانى ده ناظر مشاراليهك بيان ايتديكى فيئاته نظراً (۳۶۴,۳۵۰ ليرا) ايدجكندن (۸۰۰,۰۰۰ ليرا) بدلات تخمهنه دن تزيلى لازم كليور ؛ بناءً عليه رضا بكك اخبارينى وموسيو والورينك صورت تقريرينى باتذكره نافعہ نظارتنه تبليغ ايله ايضاحات ايستدم . كلن جواب اختلافى درجهٔ كافيه ده مدافعہ ايدميور . « سعيد پاشا بوسوزلريله بنم ريختيمك اشتراىنى تسهيل ايجون مساحه سنى قصدآ زياده كوسترمك ايستمش اولديغى اكلاتمق ايسته يور . بردفعه بوقدر بيوك برمعامله نك نافعہ ناظرينك افاده شفاهيه سنه استناد ايدوب ايدميه جكى مسئله سنى مصالح دولت حقنده اوافق بر فكر صاحبي اولانلر پك قولاي حل ايدرلر . صكره بوخصوص حقنده قلمه آلتوب مقرون مساعدۀ سنه اولان ۲۴

جمادی الاخر سنه ۳۲۰ تاریخلی مجلس وکلا مضبطه سنده مقدار مساحه حقنده طرفدن بر شی سویلندیکنه دائر قید ودالاتده یوقدر. بالعکس سعید پاشانک نظارته یازمش اولدینی بر تذکره رسمیه ده « نظارت جایه لری هیئت فنیه سی طرفدن مقدما تنظیم اید بلوب خارجه دائره سنده منعقد قومیسونه اعطا اولنان پوصله ده ریختمک مساحه سطحیه سی اصل ریختیم سطحی وز قاقلر و غلطه و مسکرات کمرکی محملریله کرچ قپوسی کمرکی داخل اولدینی حالده قرق بریک اوتوز ایکی مترو مربعی مرقم اولوب الخ » صراحتنک عیناً مندرج بولمنسی مقدار مساحه نک مجلس وکلاده افاده شفاهیه مله دکل اندن برخیلی زمان اولدن بری جریان ایدن معامله رسمیه ایله اکلاشلیغنی واضحاً اثبات ایدر. بناءً علیه خاطر اتده شوافاده نک بکا عطفی و مقدار مساحه حقنده بعده ظهور ایدن اختلافاتک نتیجه سندن (نظارته وقوع مخابره دن صوکره چوق زمان کچمکسزین استعفا و انفصالم واقع اولدیغدن مسئله یی حل ایتک وظیفه سی خلفم فرید پاشایه انتقال ایتشدر) حاشیه سیله عدم معلوت بیان ایدلمسی شایان استغرابدر. چونکه حقیقت حال شوندن عبارتدر :

مارالیان مضبطه نک تنظیمندن براز صکره سعید پاشایه ریختمدن انه حق اراضینک مقداری حقنده براخبار واقع اولمش ؛ مخبرایله برانکده موسیو والوری یی تحقیقه مأمور ایتمش . موسیو والورینک خریطه اوزرنده اجرا ایتدیکی مساحه نتیجه سی اولجه تعیین اولنان مقدار مساحه دن (۸,۴۰۰ مترو) نقصان ظهور ایلش . اقتضاسنک

ایفا و انباسی تبلیغیه باب عالیدن نظارته اشعار کیفیت ایدلدی .
 بوکاجواباً موسیو چنغریا و موسیو والوری ایله نظارت مأمورلرندن مرکب
 بر قومیسئون تشکیلی استیذان ایدیلرک بونک اوزرینه آلتان صدارتک
 اشعار جوابیسی و جهله موسیو والوری ایله نظارت مأمورلرندن و علی رضا
 بکدن مرکب بر قومیسئون تشکیلی ایله یکیدن اجرای تحقیقات
 اولندی . بودفعه موسیو والوری اولکی مساحه سنده سهو وقوع بولدیغنی
 بیان ایله تصحیح کیفیت ایتشدیرکه بوکادائر و یردیکی راپورلر و اوراق
 سائر نافعہ نظارتندہ محفوظ و نتیجہ تدقیقاتی مبین اوله رق - پاشای
 مشارائیه هنوز صدارتده - ایکن نظارتدن جواباً یازیلان تذکرہ
 ایضاحات کافیہ بی حاویدر . ایشتہ تذکرہ نک عیناً صورتی شودر :
 « ریختم شرکته عائد اراضینک سطحی موسیو چنغریا طرفدن
 محضی خریطہ اوزرینه معمار موسیو والوری معرفتیلہ مساحہ
 ایدیلرک تنظیم و اعطا و رسومات امانت جلیله سی تعرفہ مدیری
 سعادتلو علی رضا بک افندی حضر تلری و ساطتیلہ امضا اولنوب ۲۱
 ایلول سنہ ۳۱۸ تاریخلی ویوز التمش طقوز نومرولی تذکرہ
 صدارت پناہیلریلہ ارسال بیوریلان ورقہ ده غلطہ جهتده ریختم سطحی
 اولان (۶،۰۱۶) وز قاقلرہ عائد (۱۳،۱۰۰) کہ جمعاً (۱۹،۱۱۶)
 مترو مربعی) محل ایله غلطہ و مسکرات کمرکلری سطح اراضیلری
 دخی داخل اولدیغنی حالده ریختم شرکته عائد اراضینک مجموع سطحی
 (۳۱،۴۰۰ مترو مربعی) کوسترلمش ایسه ده اولبابده وقوع بولان
 استیذان اوزرینه شرف تواردایدن ۲۲ ایلول سنہ ۳۱۸ تاریخلی
 ویوزیتمش نومرولی تذکرہ سامیہ فخیمانه لرندہ امر و اشعار بیورلدیغنی

اوزره موسیو والوری ایله نظارت مأمور لرندن ومشارالیه علی رضا بکدن مرکب تشکیل اولنان قومیسسیونده جریان ایدن تدقیقات اوزرینه موسیو والوری طرفندن تنظیم واعطاقلنان ایکی قطعه راپور ایله نظارت هیئت فنیه سنجه قلمه النان راپور ترجمه لری لفاً تقدیم قلمش ومطالعہ لرندن محاط علم سامی^۱ داورا کر میلری بیوریلہ جنی وجهله موسیو والوری اولجه اعطا ومشارالیه رضابک وساطتیه امضاقلنان ورقه ده سهو وقوعنی اعتراف ایله ریختیم شرکته عا ئدار اضینک مجموع مساحه سطحیه سی اصل ریختیمک سطحی وزقاقلری وغلطه ومسکرات کمرکاری محللری مساحه سطحیه لری داخل اولدینی حالده (۳۸،۷۰۰ مترو مربعی) ایدوکی ویالکیز کرچ قپوسی کمرک محلی ایله لیمان وقرانته دائره لری بومساحه نک خارجنده بولندینی مومی ایله موسیو والوری ایله مشارالیه علی رضا بک طرفندن ممضی ۱۲ تشرین اول سنه ۳۱۸ تاریخلی راپورده کوسترلش ونظارت هیئت فنیه سنجه مقدما تنظیم ایدیلوب خارجیه دائره سنده منعقد قومیسسیونه اعطا قلنان پوصله ده ایسه ریختیمک مجموع مساحه سطحیه سی اصل ریختیم سطحی وزقاقلر وغلطه ومسکرات کمرکی محللریله برار بیک ایکی یوز التمشیش مترو مربع کیرچ قپوسی کمرک محلی دخی داخل اولدینی حالده (۴۱،۰۳۲ مترو مربعی) مرقم بولنش ایدوکنندن شو حالده آرده کی فرق یک جزوی اولوب بوده موسیو والورینک اساس اتخا ذ ایتدیکی خریطه بیکده بر مقیاسنده بولنسیله نظرک قوه تخمینیه سندن نشأت ایده بیلہ جکی بیان اولنغله اولاباده .»

برده دوائر حکومتہ وانترپولرہ وسوقاقلرہ ورینخیمه تخصیص

قلماندن ماعداليوم غلطه وسرکه جي جهتلرنده باسند خاقاني ريختيم
 شرکته قرق بشيد بوقدر زراع عرصه بولنديغندن شفاهاً
 ريختيم اراضيستك مقداري اوتوز ايکي بيک بوقدر زراع ديدیکم
 فرض اولنسه بيله سعيد پاشا حضرتلرينك ديدیکی کي ريختيم اراضيستني
 فضله دکل بالعکس نقصان سويش اوله يورم. والحاصل مشاراليهک
 بويجه دائر يازديني شيلرک اساساً حکمسزلکيله برابر واقعه موافق
 اولمديني تفصيلات آنفهدن مستبان اولمقده در. حقيقت و صورت
 حالي علي وجه الصحه تين ايدن بوو ثائق نظارت اورا قنده تماماً
 موجود اولديغندن لدی الحاجه عيناً کوريله بيلور. رضا بکله موسيو
 والورينك بالذات سهو و خطا ايتدکريني معترف اوله رق ويردکري
 راپورلرله مؤيد بولنان بواجوبه نك خاطرات افاده سي کي «اختلافي
 درجه کافيه ده مدافعه» دکل تعبير صحيح ايله سهو واقعي تصحيح
 ايدوب ايتديکني ارباب عقل سليم تقدير ايدر.

*
 **


ايشته سعيد پاشا حضرتلرينك بکا بغير حق روا کوردیکی
 اسنادات واتهاماتک حقيقت و ماهيتي بودر. برمدتدر راحتسز اولديغ
 حالده برچوق مساعي زانده اختياريله شومدافعه يي انجق غيرت
 ناموس ايله يازه بيلدم. آرتق بوايضاحات ايله تنوير ايتمش اوله جغني اميد
 ايتديکم افکار عموميه يه توديع دعوی ايلرم.

مجلس اعيان اعضا سندن

٢٧ نيسان ١٣٢٧

ذهني





3 1761 06981463 0

DR

568

.8

Z5S2